

ores trifariam diuiserunt, tres angulos esse constitutos dixerunt.

Aries.

20.



Ita existimatur esse qui Phrixum transtulisse & Hellen dictus est, per Hellespontum, quem Hesiodus & Pherecides ait habuisse auream pellem, de qua alibi plura dicemus. Sed Hellen decidisse in Hellespontu, et a Neptuno compressam, Peona procreasse complures, nonnulli Edonum dixerunt. Præterea Phrixum incolumem ad Aetam peruenisse, & arietem Ioui immolasse, pellem in templo fixisse, arietis ipsius effigiem ab Ioue inter sidera constitutam, habere tempus anni quo frumentum seritur, ideo quod ortu seuerit ante que maxime fugæ fuit causa. Et Eratosthenes ait, arietem ipsum sibi pellem auream detraxisse, & Phrixo memoriæ causa dedisse, ipsum ad sidera peruenisse, quare ut supra diximus obscurius uideatur. Hunc autem nonnulli dixerunt in oppido Orchomenio quod est in Bœotia natu. Alii in Salonu Thessaliæ finibus procreatum. Alii dicunt Crethea et Athamantem cum aliis pluribus Aeoli filios fuisse. Nonnulli etiam Athamantis filium, Salomon esse Aeoli nepotem dixerunt, Crethea autem habuisse Demodicem uxorem, quam alii Biadicem dixerunt. Hanc autem Phrixo Athamantis filii corpore induente in amorem incidisse, neque ab eo ut sibi copiam faceret impetrare potuisse. Itaque necessario coactam criminari eum ad Crethea coepisse, quæ diceret ab eo uim sibi penè allatam, & horum similia mulierum consuetudine dixisse. Quo facto Crethea ut uxoris amantem permotum Athamanti, ut de eo supplicium sumeret, persuasisse. Nubem autem inuenisse, & reptum Phrixum et Hellen eius sororem in ariete posuisse & per Hellespontum quam longissime posset perferre iussisse: Hellen decidisse & ibi debitum naturæ reddidisse. Ex huius nomine Hellespontum appellatum: Phrixum Colchos peruenisse, & ut ante diximus arietis interfecti pellem in templo fixisse. Ipsum autem à Mercurio ad Athamantem reductum, qui patri eius satisfecerit, eum innocentia confusum profugisse. Herimippus autem dicit, quo tempore Liber Africam oppugnauerit, deuenisse cum exercitu in eum locum, qui propter multitudinem pulueris Ammodes est appellatus. Itaque cum in maximum periculum deuenisset, quod iter necessario facere uidebatur, accessit eo ut aquæ maxima penuria esset, quo facto exercitus ad defectionem maximam uenire coegebatur, qui quid agerent dum cogitant, aries quidam fortuito ad milites eorum errans peruenit, quos cum uidisset, fuga sibi præsidium parauit. Milites autem qui eum fuerit conspicati, etsi puluere & æstu pressi uix progrediebantur, tamen ut prædam ex hiis petentes, arietem sequi coeperunt, usque ad eum locum, qui Iouis Ammonis postea templo constituto est appellatus. Quo cum peruenissent, arietem qui consecuti fuerant, nusquam inuenire potuerunt. Sed quod magis hic fuerat optandum, aquæ magnam copiam eo loco nacti sunt, corporibusque recuperatis, Libero statim nunciauerunt, qui gaudens ad eos fines exercitum deduxit, & Iouis Ammonis templum cum arietinis cornibus simulachro facto constituit, arietem inter sidera figurauit, ita ut cum Sol in eius foret signo, omnia nascentia recrearentur, quæ ueteris tempore fiunt, hac re maxime quod illius fuga Liber recreauit exercitum. Præterea. xii. signorum principem uoluit esse, quod ille optimus exercitui fuerit ductor. Sed de Ammonis simulachro Leon, quæ res Aegyptias descripsit ait. Cum Liber Aegyptum, & reliquos fines regno teneret, & omnia primus hominibus ostendisse diceretur, Ammonem quendam ex Africa uenisse, & pecoris multitudinem ad Liberum adduxisse, quo facilius & eius gracia uteretur, & aliquid primus inuenisse diceretur. Itaque pro beneficio ei Liber existimatur agrum dedisse, qui est contra Thebas Aegyptias, & qui simulachra faciunt Ammonis, eum capite cornuto instituant, ut hominum memoria teneant eum primum pecus ostendisse. Qui autem Libero factum uoluerunt assignare, quod non petierit ab Ammone, sed ultro ad eum sit adductus, simulachra illi cornuta faciunt, & arietem memoriæ causa inter sidera fixum dicunt.

Hic